

AGAMA ISLAM DALAM MEMBENTUK RIWAYATNYA

Berdasarkan perikemanusiaan

“..... syariat Islam adalah syariat amalan, bukan syariat teori semata-mata, oleh itu..... gunakanlah (ajaran) Quran itu di masjid, di sekolah, di mahkamah, di pejabat, di gedung perniagaan, di parlimen, di hemat tentera, di pusat keamanan dan di mana juga kita bergerak.....” demikian kata Al Ustaz Abu Bakar Hamzah dari “Perintis Ekonomi Islam” Pulau Pinang dalam karangannya ini—P.Q.
(oleh: Abu Bakar Hamzah)

Insan, hanyalah merupakan sekumin debu berbanding dengan alam maya yang maha luas, dia sememangnya lemah, tidak sanggup membuat keputusan mengapa ia berada di alam ini, dan tidak tepat meneka apa dan di manakah kebaikan alam yang mesti dia cari semasa hidupnya -dia memang lemah dan tidak sanggup andainya dia dibiar bergantung nasib kepada kekuatan dirinya sendiri sebagai insan. Oleh yang demikian, Tuhan yang Maha Adil, telah tidak membiarkan insan itu hidup percuma dengan tidak mempunyai erti, sesat laksana si buta kehilangan tongkat, tidak tahu menuju entah ke mana. Sebagai bukti keadilannya, Tuhan melengkapkan insan itu dengan nur akal fikiran yang menyuluh ke arah jalan kebaikan, dan yang membentangkan kepadanya cara hidup yang nyata lagi tegas. Dengan pesawat akal fikiran daru Tuhan inilah maka insan itu cuba mengetahui apakah itu alam buana, di manakah sendi hubungan dirinya dengan alam tersebut, dan ke manakah matlamat terakhir yang sepatutnya insan itu memusat serta menumpukan mata hatinya. Dengan kenyataan yang demikian, maka falsafah meletakkan kepercayaan kepada apa yang dikatakan

“perbendaharaan perikemanusiaan” itu, dalam zaman sebelum usaha-usaha mengadakan perbandingan di antara syariat-syariat Tuhan dan ciptaan otak manusia biasa, falsafah yang semacam itu menjadi sumber suci bagi pengubalan segala peraturan, pendapat, falsafah hidup sama ada mengenai ertikata beragama dan hidup bermasyarakat mahupun mengenai sudut-sudut ilmu pengetahuan yang lain.

Memang tidak dapat siapa pun menafikan niali suluhan akal fikiran terhadap peraturan hidup jenis insan, tetapi di samping akuan ini, insan juga tidak dapat menafikan bahawa kekuatan cahaya akal fikiran itu seringkali tersasul lalu sesat ke merata liku dan lubang jika akal itu cuba memancarkan nur cahayanya untuk mencapai sesuatu kebenaran yang terkeluar dari kesanggupannya, terutama sekali jika akal itu cuba menggambarkan apakah itu “alam tertinggi” dan segala hubungannya yang berupa kerohanian, maknawi, dan seni fikiran. Sebab insan pernah menggunakan akal fikiran biasa untuk mencari-cari apa itu “alam tertinggi”, maka timbulah

bermacam-macam falsafah ketuhanan yang sesat bagi apa yang telah kedengaran di beberapa buah negeri Timur, Gerik Tua dan lain-lainnya. Falsafah sesat yang memesongkan mata hati insan daripada cahaya suluhan Ilahi itu, amatlah nyata merupakan suatu olokkan dari Insan sendiri terhadap kecemerlangan akal yang dianugerahi Tuhan. Falsafah-falsafah ketuhanan tadi nyata sesat lagi menyesatkan hingga insan biasa malah haiwan dan puaka, tungkul, batu dan gaung suara pun dikira “Tuhan” yang ghaib dan yang berkuasa terhadap insan dan alam buana. Akal biasa pun boleh nampak bahawa “Tuhan-tuhan” khayal yang begitu banyak bilangannya, berdengki-dengkian dan berperang sesama sendiri bagi menimbulkan akibat bencana ke atas jenis insan sendiri dan terhadap alam indah serta isi kandungannya.

Biarpun “Tuhan” khayal itu berperang dan biar insan itu menyesatkan dirinya sendiri—biar pun begitu, namun Tuhan yang Maha Esa tetap adil lagi bijaksana. Allah ‘azza wa jalla memang mengetahui bahawa insan itu tidak ada ertinya apatah lagi pengaruhnya kalau dia d biarkan dengan gelombang akalnya. Sebagai bukti keadilan dan kebijaksanaan-Nya bagi memberi rasa tanggungjawab kepada insan dalam pengertian mengapa ianya diwujudkan dan untuk apa dia dilengkapkan, maka Allah memberi penjelasan: Ini di lakukannya melalui beberapa utusan dari jenis insan sendiri; dan utusan-utusan inilah yang menjadi penyebar dan pembela syariat Ilahi dari langit, iaitu suluhan nur Ilahi yang kita lihat menembusi alam kegelapan yang ditimbulkan oleh insan sendiri, memancar cahayanya dari semasa ke semasa sampai sesuai dengan peringkat kesedaran tata fikir

sesuatu angkatan dan sesuatu bangsa dalam dunia ini.

Alam ini baharu, berubah-ubah menerima proses perkembangan dari segi unsur kebendaannya juga dari segi kerohanianya, itulah sebabnya maka “suluhan Ilahi” dari Tuhan itu telah datang tidak dengan sekaligus tetapi beransur-ansur dari satu syariat ke satu syariat, dibawa oleh seorang Rasul demi seorang Rasul sekira-kira sesuai dengan zaman, angkatan dan suasana masing-masing. Kesungguhan ini nyata terpampang bila kita sendiri menyaksikan bahawa tiap-tiap agama itu dianuti oleh pemeluk-pemeluknya yang tertentu bagi zaman-zaman yang tertentu pula, hingga zahir Nabi Muhammad (SAW) membawa syariat yang sesuai dengan segala peringkat, zaman dan susana. Syariat Nabi Muhammad adalah merupakan suatu falsafah hidup bagi jenis insan seluruhnya sebab masyarakat insan telah rosak, sesat dan lama menunggu sesuatu syariat baharu yang akan menyelamatkan mereka. Pertunjuk Ilahi yang baharu itulah dianya “Islam”. Dengan demikian, memang sudah tepat bahawa “perikemanusiaan itu menunggu Islam”.

Ya, sejarah alam membuktikan bahawa masyarakat manusia memang menunggu-nunggu agama penyelamat yang baru, setelah segala tunjuk ajar dari Rasul-rasul yang terdahulu telah tidak diendahkan lagi, dan telah ditukargantikan dengan rekaan otak manusia.

Cara mencari kebenaran yang sihat adalah mengembalikan sesuatu masalah kepada sejarah, kemudian diadakan penyiasatan yang cermat, dan terus dibuat perbandingan yang berdasarkan ilmu pengetahuan dan membuang yang keruh serta mengambil yang jernih. Untuk ini saya ingin mengulangkaji sejarah perkembangan masyarakat manusia dan pengaruh agamanya.

Masyarakat bangsa Arab

Di negeri Arab, zaman dahulu, orang-orang menyembah berhala-berhala yang mereka sendiri membuatnya daripada batu.

Apabila Nabi Muhammad diutuskan, berserulah ia kepada orang-orang Arab itu “ Wahai orang-orang Arab: aku sekarang ini hendak mengumpulkan semua “Tuhan” kamu ini ke bawah satu Tuhan Yang Esa, sungguh ajaib apa yang kamu buat sekarang ini”. Nabi Muhammmad (SAW) datang membawa aliran perubahan fikiran bagi menolak faham dongeng dan falsafah khayal.

Masyarakat bangsa Parsi

Di dalam tata hidup umat Parsi, selain dari agama Majusi, ada banyak agama yang lain yang menyuruh penganutnya menyembah berhala dan sebagainya. Di antara agama-agama khayal itu terdapat satu agama yang kuat pengaruhnya, iaitu: agama yang mempercayakan ada Tuhan khas bagi urusan kebaikan dan ada lagi satu Tuhan yang lain khas bagi urusan kejahanan. Penganut-penganut agama “dua Tuhan” ini siang malam berada di dalam keimbangan, takut kalau-kalau terjadi perlawanan di antara Tuhan kebijakan dengan Tuhan kejahanan. Di dalam suasana khayal dan keimbangan tadi, zahirlah seorang bernama “Mazdak”, menyeru jangan hiraukan Tuhan-tuhan sama ada Tuhan kebaikan mahupun Tuhan kejahanan, tetapi marilah kita sesama manusia membuat aturan dan tata hidup sendiri. Falsafah hidup yang telah dirangkakannya ialah:

“Kita manusia semua bersaudara, sebagaimana kita harus menikmati faedah dari air, api dan rumput, yang dikira hak kita bersama dengan tidak ada apa-apa batasan, maka begitulah juga

hartा kita dan anak isteri kita. Kalau suka sama suka, itulah aturan kita. Walau siapa juga yang menzahirkan anak dari siapa juga wanita tidak kira adik atau ibu atau kakak sendiri atau isteri kawan, itu adalah anak kita beramai-ramai dan wajib kita memeliharanya”.

Faham yang semacam ini masih merebak dengan derasnya di dalam masyarakat yang bercorak komunis dan sedang menjalakan jarumnya ke dalam masyarakat-masyarakat yang bercorak sosio-nasionalis. Gambarkanlah betapa hebatnya bencana yang menimpa masyarakat Parsi akibat dari faham “suka sama suka” itu! Geli hati kalau-kalau kita cuba menggambarkannya. Tidak cukup dengan aliran haiwan itu, oleh raja-raja Parsi serta keluarga di-Raja mereka diperhambakannya rakyat jelata dengan keyakinan bahawa “darah Tuhan” sedang mengalir dalam tubuh mereka, dan dengan demikian mereka lahir manusia istimewa, manusia yang berdarah Tuhan. Rakyat jelata yang sudah keluar lidahnya dan kaku kaki tangan itu memandang mereka sebagai Tuhan.

Dengan demikian mereka pun menyerah diri—tenaga, harta, fikiran, jiwa dan hati untuk mencari keredhaan Raja-raja itu. Mana juga masyarakat yang Rajanya menyangka dirinya “Tuhan” maka kecelakaan Raja itulah yang menjadikan masyarakat rakyatnya sebagai neraka. Raja-raja yang bersifat seperti itu patut disingkir dari masyarakat. Sebab dengan wujudnya faham Mazdak itu, maka masyarakat Parsi pada zaman itu telah terbahagi kepada beberapa tingkat dan golongan, tiap-tiap tingkat amat berbangga dengan keturunannya dan jawatan kerajaannya, hingga tiap-tiap orang mestilah beriman dengan nasibnya yang diaturkan oleh pihak pemerintah, tidak harus dia meninjau-ninjau mencari taraf yang lebih baik

dan lebih mulia.

Menurut kebenaran sejarah ini, nyatalah bahawa masyarakat Parsi pada zaman itu sangat berhajat kepada satu syariat ciptaan Tuhan yang Maha Esa bagi menyelamatkan mereka dari kekejaman Raja-raja mereka sendiri, dan sewajarnya syariat yang di tunggu-tunggu itu hendaklah munasabah bagi akal, sanggup membawa peraturan bagi tata hidup bermasyarakat, dan yang memberi peluang kepada tiap-tiap insan meninjau ke arah apa yang lebih benar, lebih baik dan lebih seni lagi mulia. Sebagai neraca falsafah hidup, rakyat jelata dari segenap bangsa wajiblah mengenal penganjur-penganjur mereka, sekiranya mereka itu asyik dengan minuman keras, asyik dengan tarian hingga kepada tarian bogel, tidak pernah menuaikan fardhu sembahyang, memandang Quran sebagai tikus memandang besi tidak sepatuh yang mengerti, lepasan sekolah-sekolah yang bersandarkan falsafah kebendaan—kalaulah mereka itu daripada jenis penganjur *toghüt* yang seperti itu maka bumi dari langit yang rakyat jelata mungkin berpeluang turut merasa nikmat hidup.

Bagaimana masyarakat boleh menjadi aman kalau ketua-ketuanya pemakan suap, peminum arak, asyikkan perempuan joget, membelakangkan Quran dalam urusan diri dan urusan masyarakat, malah tunggulah saat kekejaman apa yang telah dirasai oleh masyarakat Parsi tadi.

Sejarah sentiasa mengulang riwayatnya. Selagi Quran itu tidak dihiraukan dalam amalan maka selama itulah kita menduakan Tuhan dalam amalan falsafah hidup kita, dengan demikian kita akan termasuk ke dalam golongan “orang-orang kafirin belaka”.

Masyarakat Rom dan Timur Tengah

Di kota Rom, Itali, di Syam dan di Mesir bertapaklah agama Masihi yang pada asalnya dibawa oleh Nabi Isa

‘alaih al-salām. Syariat langit ini pada asalnya menyeru manusia supaya menyembah Allah yang Maha Esa, supaya mereka tinggalkan segala keburukan akibat dari falsafah khayal, ber-Tuhan-tuhan dan menyembah Raja-raja. Nabi Isa ialah Rasul dari Allah, membawa ajaran Ilahi, tetapi pengikutnya telah mencabulkan ajaran suci itu dengan memasukkan bermaca-macam tambahan yang karut-karut.

Kelanjuran

ini bukan sahaja berlaku dalam kalangan mereka yang menjadi pengikut Isa, tetapi juga telah berlaku dalam kalangan semua penganut-penganut agama-agama dari langit termasuklah juga di kalangan kita orang-orang Islam sebab ada terdapat banyak orang menambah, menokok, membuang, begitu dan begini hingga Islam itu menjadi kesamaran kepada angakatan-angakatan baru. Ini tidak hairan, di mana juga ada kebenaran di situ juga ada unsur kepalsuan, di mana juga ada ajaran Nabi Muhammad di situ juga ada-ada sahaja aliran Abu Jahal.

Menurut sejarah, agama Masihi itu telah dibahagi-bahagikan kepada dua bahagian:

- (1) Masihi yang bercorak Ortodoks bertapak di dalam empayar Rom bahagian timur, dan
- (2) Masihi yang bercorak Katholik dalam empayar bahagian barat yang berpusat di Kota Rom.

Dengan adanya pembahagian yang salah ini, terjadilah ketegangan di antara ke dua corak tadi hingga masing-masing mengaku dirinyalah yang betul sedang bahagian yang satu lagi itu semua salah belaka. Kedua mazhab Masihi ini telah berpecah menjadi dua agama yang berlawanan bukan sahaja dalam urusan ranting tetapi hingga kepada pokok ketuhanan dan dasar ajaran. Satu mazhab mengatakan Isa keturunan Tuhan—bukan manusia biasa, sedang satu mazhab lagi mengatakan Isa itu ialah percampuran di antara manusia dengan Tuhan

Sudahkah tuan berlanggan dengan majalah

Qalam

Berdasarkan al-Quran dan al-Hadis al-Sharif

Kalau belum, berlangganlah sekarang juga!

Harga langganan;

6 bulan \$3.60

12 bulan \$7.20

Termasuk belanja pos.

Langganan sekurang-kurangnya 6 bulan.

Alamatkan kepada;

QALAM

356 & 358, Geylang Rd,

Singapore-14.

ini keduanya salah belaka. Sebenarnya nabi Isa itu ialah manusia biasa, diutuskan Tuhan sebagai Rasul membawa syariat penyelamat masyarakat manusia, tetapi khayal manusia itulah yang mengada-adakan itu dan ini. Islam pun mengaku kebenaran Nabi Isa itu seperti mana Nabi Isa juga telah berwasiat kepada umatnya bahawa akan datang suatu agama dibawa oleh Nabi Muhammad, tetapi pengikut-pengikut Nabi Isa banyak yang menyembunyikan kebenaran dalam kitab mereka sendiri.

Apa kata Thomas Arnold

Tuan Dr Thomas Arnold, seorang sarjana sejarah berkata:

“Ahli-ahli falsafah ketuhanan di benua Afrika dan negeri Syam—seterusnya negeri-negeri yang menganut agama Masihi saya katakan—telah pun memandai-mandai lalu

menukar syariat Masihi yang asal itu dengan akidah-akidah metafizik, yang membicarakan apa yang di luar sempadan sains, dengan cara yang ganjil sekali...
...hingga dengan aliran yang mereka ada-adakan itu, banyaklah manusia telah menjadi “musyrik” menduakan Tuhan yang Maha Esa dengan tidak mereka sedari, lalu mereka menyembah sepuak ketua-ketua, puak orang-orang yang dikatakan mati syahid dan ada yang menyembah malaikat dan ketika itu, puak-puak diraja telah bermahrajalela memenuhi nafsu malam dan siang hingga tidak ada perbezaan pokok-pokok di antara zina dan nikah, kejelitaan wanita itulah yang menjadi nikmat dan pujaan mereka, dara dan terunanya berasmara dengan tidak berbatas di dalam istana-istana sedang golongan sederhana mengeluh oleh beratnya cukai-cukai negeri. Golongan buruhlah yang malang sekali, hingga tidak ada peluang bagi meninjau di mana ada timbang rasa yang dapat mereka mengadu sama ada untuk zaman hidup mereka apatahlagi untuk anak cucu mereka masa hadapan. Segala kekejaman itu, sekarang dengan Iradat kehendak Tuhan Yang Maha Esa, telah diatasi oleh suatu syariat baharu yang dibawa oleh Nabi Muhammad. Syariat itu ialah Islam yang merupakan suatu pemberontakkan terhadap dongeng mengenai falsafah-falsafah ketuhanan dan kepercayaan ghaib merupakan suatu dalil yang tepat lagi nyata mengalahkan falsafah kuno yang mendewa-dewakan paderi-paderi, konon mereka itulah yang menjadi “penghulu ibadat kepada Tuhan” yang di kira sebagai wakil tunggal dari Allah ke alam buana ini. Islam telah menyeru manusia kepada mengesakan Tuhan dan kebesarannya, bahawa Tuhan itu Esa, kepada-Nyalah insan menyembah dan mengembalikan segala nasib dirinya dalam masa duka dan suka. Islam mencanangkan bahawa tiap-tiap insan itu adalah bertanggungjawab terhadap dirinya dan terhadap Tuhan, dan kelak akan ada suatu “hidup” yang lain pada hari Kiamat

kelak, di mana manusia akan menerima balasan baik atau buruk yang dikerjakannya semasa hayatnya ini. Berbahagialah mereka yang amalkan kebaikan dan celakalah mereka yang membelakangi perintah Tuhan. Tuhan yang berkuasa menjadikan, maka Tuhanlah juga yang hanya berkuasa menentukan nasib insan dan membalsanya.

Islam menentukan cara-cara ibadat yang yang sihat yang lantas kepada Tuhan, tidak melalui mana-mana wakil tunggal, mengadakan peraturan zakat sebagai jaminan hidup bermasyarakat kepada golongan yang terduga, dan menyeru insan kepada kebajikan masyarakat manusia sepanjang masa. Islam juga menjaga manusia dari terpedaya oleh “kemuliaan palsu”, daripada pertengkarai kosong yang tidak membina, dan daripada gelombang budya yang rendah lagi menyesatkan, daripada menuduh “engkau kafir akulah muslim tulen—engkau salah aku benar”, dan Islam juga yang mengubah sanubari insan dari membeku laksana melukut di tepi gantang kepada jiwa bertanggung jawab yang berani kerana benar dan takut kerana salah, dan membuka peluang kepada golongan “hamba” bahawa mereka juga layak menjadi “tuan” mereka tidak berputus asa daripada mencari kelayakan diri, dan Islamlah yang tepat mengadakan dasar-dasar persaudaraan yang boleh di gunakan dalam ertikata hidup bermasyarakat di dalam maya ini. Tegasnya Islam telah berjaya memberi kesedaran bahawa tiap-tiap insan itu dari semula jadinya memang berhak mempertahankan hak-hak asasnya yang dikira hak mutlak dalam ertikata “perikemanusiaan”.

Jadi inilah yang di katakan “perikemanusiaan menunggu kedatangan Islam”. Demikian huraian Thomas Arnold. Ahli sejarah yang bukan Muslim ini, berkata lagi;

“Dapat di tambahkan bahawa banyak penyelidik-penyelidik dan penyiasat-penyiasat telah terpesong dari apa yang sebenar, lalu

mereka menuduh bahawa derasnya siaran Islam di peringkat pertamanya dahulu adalah konon bersebab dari kebencian masyarakat terhadap falsafah khayal yang diamalkan oleh paderi-paderi Masihi. Kenyataan ini pada suatu segi juga benar tetapi bukan itu sahaja yang menjadi rahsia perkembangan Islam. Sebenarnya apa juga aliran falsafah yang salah sudah tentu akan lebur di hadapan kebenaran Islam laksana leburnya air batu di hadapan matahari. Dalam zaman itu Maharaja mereka mensifatkan dirinya sebagai keturunan Tuhan, dan akibat dari falsafah salah ini, maka bencana yang amat hebat telah berleluasa dalam zaman Justinian—seorang pencipta undang-undang falsafah hidup Rom—hingga Justinian itu meletakkan di bawah kakinya apa juga yang di fahamkan oleh paderi-paderi di gereja, apatah lagi yang dirayu-rayukan oleh rakyat jelata yang taraf mereka di kira hamba sahaja. Butir-butir yang dibawa oleh sejarah Ilmu tadi, adalah bukti yang tidak dapat di embunyikan bahawa masyarakat manusia menunggu-nunggu ketibaan suatu petunjuk dari Tuhan yang Maha Esa bagi menyuluh masyarakat manusia ke arah cahaya, keadilan dan ketenteraman. Dengan keadilan Tuhan, syariat yang ditunggu-tunggu itupun zahir, dibawa oleh Nabi Muhammad itulah dia syariat Islam untuk seluruh masyarakat manusia dari Timur ke Barat, dari Utara ke Selatan tidak kira apa juga keturunan, warna kulit, suku bangsa, dan golongan”. Demikian Thomas Arnold menutup huraianya itu.

Sekarang Apa Pula?

Kita menegaskan bahawa itulah dia apa yang dikatakan syariat Islam, syariat yang terkemudian sekali dari segala syariat langit, syariat yang di tunggu-tunggu oleh masyarakat manusia mereka sekarang sudah tiba. Memancar suluhan hidayahnya, disaksikan semua manusia hingga si

buta pun boleh, merasai nikmat pencahayaan kecuali mereka yang buta mata hati, yang tidak ,mahu menggunakan akal fikiran, dan mereka yang dengan sengaja menyembunyikan kebenaran kerana menjaga maslahat diri dan haloba akan kedudukan tinggi dalam kalangan jenisnya sendiri. Semua syariat langit adalah bersatu pada pokok ke-Tuhanannya, tetapi berlainan corak dan tugasnya sebab mencari persesuaian dengan zaman, tempat, suasana dan taraf kesedaran masyarakat manusia dari satu masa ke satu masa. Semua syariat langit bermula dari Nabi Adam, dan berkembang melalui beberapa Rasul yang lain, hingga kepadा Musa dan Isa dan akhirnya sebagai penutup zahirlah Nabi Muhammad, maka tidaklah ada lagi Rasul selepas Nabi Muhammad, sebab Quran itu sudah lengkap dan meliputi apa juga dasar falsafah hidup bagi masyarakat manusia dalam masa hidup dunia dan membawa kepada kesentosaan abadi di akhirat kelak.

Tetapi hendaklah di sedari oleh semua orang bahawa syariat Islam adalah syariat amalan, bukan syariat teori semata-mata, oleh itu kalau tidak kita amalkan ajarannya maka tidak akan datang sebarang untung kepada kita, malah kita akan dikutuk oleh Tuhan pula, dan cara Tuhan mengutuk kita memang nyata sekali kalau kita menghalakan pertanyaan: “Mengapa penganut-penganut Islam pada masa ini telah terjajah?” Jawapannya: Itulah dia balasan Tuhan kepada mereka yang diberi petunjuk tetapi tidak mahu mengambil faedah-faedah dari pertunjuk itu. Gunakanlah Quran itu di masjid, di sekolah, di mahkamah, di pejabat, di gedung perniagaan, di parlimen, di hemat tentera, di pusat keamanan dan di mana juga kita bergerak menyusun hidup—gunakanlah ajaran Quran itu dan tinggalkanlah segala undang-undang yang zahir dari falsafah yang berdasarkan khayal dan otak manusia biasa.

KENYATAAN KEPADA ANGGOTA-ANGGOTA IKHWAN

Pimpinan Ikhwan dari satu ke satunya berharap mendapat kerjasama dari anggota-anggota Ikhwan. Ikhwan selalu mengadakan ceramah-ceramahnya di Singapura dan untuk memberi peluang kepada saudara-saudara yang di luar Singapura maka kami mengusahakan supaya ceramah-ceramah itu dibukukan.

Ceramah yang pertama yang diucapkan oleh Profesor Abdul Kahar Muzakkar telah kami siarkan.

Yang kedua—risalah “kesedaran” kami juga telah siarkan.

Yang ketiga ucapan Kiyai Muhammad Arshad Thalib Lubis sedang kami usahakan, juga ucapan Kiyai Nasruddin Latif tentang “rumahtangga” sedang kami usahakan untuk dibukukan.

Bagi satu risalah itu kami tidak meminta bayaran harganya daripada anggota-anggota Ikhwan tetapi kami meminta tiap-tiap seorang meghantarkan setiap 10 sen untuk belanja mengirimnya—lainnya tidak.

Tujuannya ialah supaya tiap-tiap anggota Ikhawan mendapat faedah manfaatnya dengan tidak berbelanja—selain daripada setem.

Pintalah kepada:

IKHWAN,

355-B Geylang Rd.,

Singapore 14.